

Hoz es Festa da tuot ils senchs
u il Di da las ormas




NOVEMBER

La Festa da tuot ils senchs ed il di da las ormas

La granda part dals dis speciels do que per render attent a qualchosa chi viva, scu per exaimpel il Di dal giat u il Di dal chaun. Ils 1. e 2 november es que ün pô oter, quels dis pensains nus a tuot ils chers umauns chi sun già morts. La Festa da tuot ils sench, ils 1. da november es ün di religius da la baselgia catolica per festager e penser a tuot ils senchs. Perque cha quel di es eir ün firo e perque cha's ho alura liber in ün pêr regiuns, vaun las personas magari già quel di sün sunteri per visiter las fossas da paraints u amihs chi sun già morts. Illa religiun cristiauna as craja cha'ls umauns hegian ün'orma, dimena ch'els sajan dapü cu be ün corp. L'orma es que chi fo dvanter unic a minch'umaun, cu ch'el sainta e pensa. l' cristianissem as craja cha l'orma vo sün tschêl cur ch'üna persuna moura. Perque es ils 2 november il Di da las ormas ed alura, u già ün di aunz, as metta fluors u chandailas sülla fossa dad üna persuna morta. Quista tradiziun dal s'algurder dals morts e da lur ormas do que in bgers oters pajais sün quist muond. Ma a nun es dapertuot qualchosa


Hest già udieu dal «Di da las ormas» u dal «Día de los Muertos»?

trist. l' Mexico per exaimpel ho quel di nom «Día de los Muertos» ed ad es üna festa plain culur. Las Mexicaunas ed ils Mexicauns crajan cha'ls morts tuornan quel di a chesa per visiter lur famiglias. Perque decoreschan els las chesas e las fossas cun fluors da palperi in tuottas culuors. A do dutscharias in fuorma da testas da morts u skelets ed ils umauns rian, sotan e quintan istorgias da las personas chi sun mortas. Per las Mexicaunas ed ils Mexicauns nun es la mort ünguotta terribel – ad es üna part da la vita. Perque festagiane il di dals morts u il Di da las ormas scu granda festa allegra.



Idejas per s'algurder e fer onur als morts

1



Fo ün bel purtret
cun culuors d'ova.

Guarda ün album da fotografias vegl,
inua cha tü chattast fotografias
da las persunas chi nu sun pü tar nus.

Scriva üna carta u üna poesia.

Quinta a qualchün da tia famiglia chi'd
es pü giuven cu tü dad ün paraint chi
nu viva pü.


Fo ün dessert u qualchos'oter da manger
cha la persuna morta vaiva gugent u
chi tuocha tar vossa tradiziun da famiglia.

Fo üna visita sün sunteri

2

Est tü già steda u sto üna vouta sün sunteri? Ün sunteri es ün lö tuot speciel. Que as disch cha'ls morts chattan lo lur pos, dimena as stu esser fich quiet sün sunteri. Que ho eir da fer cun respet visavi ils con-familiars ed amihs chi visiteschan

las fossas. Tü sentiost – sün sunteri regna ün'atmosfera fich speciela. Que nu's stu avair tema, ma listess es que meglder da visiter ün sunteri insembel cun üna persuna creschida. Cun ella poust tü discuorrer sur da las du-mandas suotvart e tuot que chi't vain adimmaint tal tema vita e mort dü-raunt vossa visita sün sunteri.



Do que üna fossa dad ün paraint sün sunteri?

Tschercha la pü bella fossa dal sunteri.

Guarda las datas süls craps da fossa:
Cura sun naschidas las persunas?
Cura sune mortas?

Che crajast tü: Cu haun ellas vivieu?

Decorescha üna chandaila da morts

3

Tü drouvast:

- üna chandaila da morts sainza decoraziuns
- culuors per pittüerer sün vaider u fleters permanents
- tacharöls permanents
- oter materiel per decorer scu bindels da culur, perlas, pennas

Stüdgia per chi cha tü voust decorer la chandaila da morts. Chenünas d'eiran las culuors prediletas da quista persuna? Vaiva quista persuna üna bes-cha da chesa u ün hobi speciel? Disegna qualchosa chi s'affo culla persuna. Fo il prüm ün sböz sün palperi e disegna pür zieva cun culur sül vaider da la chandaila. Decorescha la chandaila cun bindels da culur u tacha sü oter materiel da decoraziun. Scha tü voust decorer üna chandaila da morts per üna persuna cha tü nu cugnuschaivast, t'imagescha simplamaing che cha quella persuna pudess avair gieu gugent. Tü poust eir disegner simbols scu cours, stailas u cruschs. Porta sün sunteri la chandaila e pozz'la sülla fossa.

